



Broj: 01-50-1-15-49/09
Sarajevo, 25. marta 2009. godine

ZAPISNIK
49. sjednice Predstavničkog doma
Parlamentarne skupštine Bosne i Hercegovine,
održane 25. marta 2009. godine

Sjednica je počela u 10 sati. Prisustvovalo je 40 poslanika, s tim što su Milica Marković i Lazar Prodanović došli sa zakašnjenjem zbog službenog puta. Opravdano su odsustvovali Jovan Todorović i Mehmed Suljkanović.

Iz Vijeća ministara BiH sjednici su prisustvovali predsjedavajući Nikola Špirić, ministri: Bariša Čolak, Sredoje Nović, Safet Halilović i Mladen Zirojević, te zamjenici ministara: Srđan Arnaut, Mijo Krešić i Vilim Primorac.

Sjednici je prisustvovao supervizor za Brčko Distrikt BiH i prvi zamjenik visokog predstavnika Rafi Gregorijan, kao i prestavnici međunarodnih organizacija: OHR-a, OSCE-a, EUPM-a, EUSR-a i britanske ambasade, te nevladine organizacije Centri civilnih inicijativa.

Također su prisustvovali Dragan Pajić, gradonačelnik Brčko Distrikta BiH, i Siniša Kisić, koordinator u Koordinacionom uredu u Vijeću ministara za Brčko Distrikt BiH.

Predsjedavajući Doma Beriz Belkić pozdravio je sve prisutne poslanike i goste te konstatirao da sjednica ima kvorum za rad i odlučivanje. Napomenuo je da je u pozivu za sjednicu, u skladu s ranijim dogovorom, predložena samo jedna tačka.

Nije bilo rasprave o prijedlogu dnevnog reda.

Predsjedavajući Belkić konstatirao je da 49. sjednica ima sljedeći

DNEVNI RED

1. Prijedlog amandmana I. na Ustav BiH - drugo čitanje.

U uvodnim napomenama predsjedavajući Doma Beriz Belkić rekao je da je prilikom usvajanja Amandmana u prvom čitanju Dom usvojio i zaključak kojim je ovlaštena Ustavnopravna komisija da, u saradnji sa Ustvnopravnom komisijom Doma naroda, održi javnu raspravu o Amandmanu u pet gradova u Bosni i Hercegovinei – u Sarajevu, Banjoj Luci, Mostaru, Brčkom i Tuzli. U skladu s ovim zaključkom, održana je javna rasprava, nakon čega je Ustavnopravna komisija pristupila razmatranju Amandmana I. na Ustav BiH u drugoj komisijskoj fazi i Domu dostavila Izvještaj. Naglasio je da je Komisija podržala Prijedlog amandmana I. i usvojila jedan amandman – kojim se određuje da Amandman I. stupa na snagu osmog dana od dana objavljivanja u „Službenom glasniku BiH“.

Dalje je predsjedavajući rekao da su u plenaranoj fazi amandmane obnovili: Klub Stranke za BiH, Mirko Okolić, Momčilo Novaković i Hadži Jovan Mitrović. Također je podsjetio da je Milorad Živković u raspravi o Amandmanu u prvom čitanju podnio prijedlog preporuka, o kojima Dom treba da se izjasni nakon usvajanja Amandmana I. na Ustav BiH.

Predsjedavajući je podsjetio poslanike da se amandmani na Ustav razmatraju po osnovnom zakonodavnom postupku, a da se usvajaju dvotrećinskom većinom poslanika koji su prisutni i koji glasaju, u skladu s članom 135. Poslovnika.

Poslije uvodnih napomena, Domu se obratio predsjedavajući Vijeća ministara BiH Nikola Špirić.

Predsjedavajući Vijeća ministara BiH je, u ime predlagача Amandmana, rekao da Amandman I. na Ustav BiH ima za cilj da provede član 5. Aneksa II. Općeg okvirnog sporazuma za mir u BiH, kojim je uspostavljena arbitraža za oblast Brčkog, te da se usvajanjem ovog amandmana osigurava da status i ovlaštenja Brčko Distrikta BiH budu inkorporirani u Ustav BiH i da ih Ustavni sud BiH može štiti, onako kako su propisani Odlukom Arbitražnog tribunala. Cilj Amandmana je i da osigura Ustavnom sudu BiH nadležnost da odlučuje o bilo kojem sporu u vezi sa zaštitom konačno utvrđenog statusa i ovlaštenja Brčko Distrikta BiH, koji se može javiti između jednog ili više entiteta i Brčko Distrikta BiH ili između BiH i Brčko Distrikta BiH, te da i Skupština Brčko Distrikta BiH također u vezi s ovim ima pristup Ustavnom sudu, rekao je, pored ostalog, Nikola Špirić obrazlažući Amandman I. na Ustav BiH. Predsjedavajući Vijeća ministara BiH posebno se zahvalio supervizoru za Brčko i prvom zamjeniku visokog predstavnika za BiH Rafiju Gregorijanu, rekavši da je uložio mnogo truda da svi zajedno danas budemo u prilici da razgovaramo o Amandmanu.

Poslije izlaganja predsjedavajućeg Vijeća ministara BiH, predsjedavajući Ustavnopravne komisije Šefik Džaferović podnio je opširno izlaganje, u kojem je obrazložio Izvještaj Komisije o Amandmanu i upoznao Dom o toku javne rasprave koju je provela ova komisija zajedno sa Ustavnopravnom komisijom Doma naroda.

U raspravi o Prijedlogu amandmana I. učestvovali su: Rifat Doilić, Hadži Jovan Mitrović, Mirko Okolić, Momčilo Novaković, Azra Hadžiahmetović, Zlatko Lagumdžija, Bakir Izetbegović, Milorad Živković, Jozo Križanović, Velimir Jukić, Martin Raguž, Vinko Zorić, Drago Kalabić, Remzija Kadrić, Branko Dokić, Sadik Ahmetović, Šefik Džaferović i Jerko Ivanković Lijanović.

Momčilo Novaković je, nakon diskusije Azre Hadžiahmetović, rekao da povlači svoj amandman.

Poslije rasprave, predsjedavajući Belkić podsjetio je da je Momčilo Novaković povukao svoj amandman i pozvao i druge predlagачe da u pauzi razmisle o povlačenju svojih amandmana. Zatim je dao pauzu i rekao da će glasanje biti u 13 sati.

Poslije pauze, Azra Hadžiahmetović obavijestila je Dom da potpisnici amandmana u ime Stranke za BiH povlače svoj amandman, uvažavajući stavove nekih poslanika iznesene u raspravi, a prije svega poziv Ustavnopravne komisije da se povuku svi amandmani.

Predsjedavajući Belkić konstatirao je da ostali predlagачi nisu povukli svoje amandmane, pa je pristupio provođenju glasanja o amandmanima Mirka Okolića (jedan) i Hadži Jovana Mitrovića (četiri amandmana).

Nije usvojen nijedan amandman.

"Za" amandman Mirka Okolića glasalo je šest, "protiv" 27, "suzdržalo" se sedam poslanika.

Rezultati glasanja o amandmanima Hadži Jovana Mitrovića su sljedeći:

- Amandman 1.– "za" pet, "protiv" 26, "suzdržanih" devet;
- Amandman 2.– "za" šest, "protiv" 25, "suzdržanih" osam;
- Amandman 3.– "za" pet, "protiv" 26, "suzdržanih" osam i
- Amandman 4. – "za" pet, "protiv" 26, "suzdržanih" osam.

Poslije glasanja o amandmanima Okolića i Mitrovića, Dom se izjasnio o Amandmanu I. na Ustav BiH, sa Izvještajem Ustavnopravne komisije.

Amandman I. Usvojen je sa 36 glasova "za" (Federacija BiH 27, RS devet), jednim "protiv" i dva "suzdržana".

Zatim je predsjedavajući dao na glasanje preporuke koj je predložio Milorad Živković. "Za" je glasalo devet, "protiv" 21, "suzdržala" su se četiri poslanika. Prema tome, preporuke nisu usvojene.

Nakon glasanja, Branko Dokić rekao je da je glasao „za“, ali da njegov glas nije registriran.

Također su Vinko Zorić i Ekrem Ajanović kazali da su glasali „protiv“, ali da ni njihovo glasanje nije registrirano.

Predsjedavajući Belkić je, nakon ovih primjedbi, konstatirao da je Branko Dokić glasao „za“, a Vinko Zorić i Ekrem Ajanović „protiv“ preporuka.

Prema tome, rezultati glasanja o preporukama su sljedeći: "za" 10, "protiv" 23, "suzdržala" su se četiri poslanika.

Ovim je završena 49. sjednica.

Zaključujući sjednicu predsjedavajući Beriz Belkić podsjetio je da će naredna sjednica Doma biti održana 1. aprila 2009. i pozvao predsjedavajuće komisija da blagovremeno sazivaju sjednice i završe svoj posao.

Sjednica je završena u 13,15 sati.

Sastavni dio Zapisnika je transkript 49. sjednice Doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Beriz Belkić